



Na osnovu člana 17. stav 2. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sutkinja Sanela Gorušanović - Butigan i sudija Velimir Ninković, potpredsjednici Vijeća, te sudija Izo Tankić, sutkinja Aleksandra Obradović, tužiteljica Bojana Jolović, advokatica mr. Duška Bogojević, tužiteljica Snježana Petković, sudija Sedin Idrizović, tužilac Saša Sarajlić, prof. dr. Džamna Vranić, tužiteljica Željka Fabić i advokatica Elma Veledar Arifagić, na sjednici održanoj 09 i 10.04.2025. godine, donijelo je

RJEŠENJE

o imenovanju tužioca u Federalno tužilaštvo Federacije Bosne i Hercegovine

- I. Za tužioca Federalnog tužilaštva Federacije Bosne i Hercegovine imenuje se **Medina Džerahović**.
- II. Datum stupanja na dužnost imenovane Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 04.11.2024. godine objavilo javni konkurs pod brojem: 04-07-3-3969-1/2024, kojim je oglašeno 9 (devet) pozicija tužioca u Federalno tužilaštvo Federacije Bosne i Hercegovine, sa iskustvom u radu na predmetima organizovanog kriminala i korupcije odnosno složenim krivičnim predmetima.

Nakon provedene konkursne procedure, Vijeće je donijelo rješenje, broj 04-07-3-424-1/2025 od 16.01.2025. godine kojim je kandidatkinju Medinu Džerahović imenovalo na jednu od devet oglašanih pozicija tužioca Federalnog tužilaštva Federacije BiH, s tim da će se o datumu stupanja na dužnost imenovane kandidatkinje, odlučiti posebnom odlukom.

Protiv navedenog rješenja, kandidatkinja Selma Peco je blagovremeno podnijela tužbu, kojom je osporila zakonitost provedenog postupka imenovanja, koji je prethodio donošenju osporenog akta tuženog.

Nakon što je Sud Bosne i Hercegovine u vijeću za upravne sporove ispitao zakonitost i pravilnost osporenog rješenja u granicama odredaba člana 35. Zakona o upravnim sporovima („Službeni glasnik BiH“ broj: 19/02 do 74/10), na nejavnoj sjednici održanoj dana 18.03.2025. godine donio je presudu, broj: S1 3 U 051195 25 U, kojom je tužba kandidatkinje Selme Peco uvažena, osporeno rješenje Vijeća, broj: 04-07-3-424-1/2025 od 16.01.2025. godine poništeno i predmet vraćen tuženom na ponovno odlučivanje, uz uputu da Vijeće u ponovnom postupku otkloni uočene nedostatke i nakon provedenog postupka donese pravilnu i zakonitu odluku.

Iz obrazloženja presude Suda Bosne i Hercegovine proizilazi da Vijeće nije dalo valjane razloge o imenovanju tužioca u Federalno tužilaštvo Federacije BiH u odnosu na tužiteljicu, čime je osporeni akt obuhvaćen povredama pravila postupka koji su bili od uticaja na zakonitost osporenog akta. Konkretno, Vijeće nije navelo razloge zbog kojih je dalo prednost imenovanoj kandidatkinji koja se nalazi na 20. mjestu rang liste u odnosu na tužiteljicu, koja je bolje rangirana, na 16. mjestu rang liste, nego je uzelo u

obzir činjenicu da je tužiteljica kao bolje rangirani kandidat u odnosu na imenovanu kandidatkinju predložena za poziciju sudije Vrhovnog suda Federacije BiH - poseban odjel.

Postupajući po presudi Suda Bosne i Hercegovine, nadležno podvijeće u ponovnom postupku je nakon sveobuhvatne rasprave, u okviru gore navedenog javnog konkursa, u skladu sa odredbama člana 43. st. (1) i (2) Zakona o VSTV-u BiH, a u vezi sa čl. 59a., 59b. i 60. Poslovnika VSTV-a BiH, utvrdilo prijedlog imenovanja za poziciju tužioca Federalnog tužilaštva Federacije BiH, sa iskustvom u radu na predmetima organizovanog kriminala i korupcije odnosno složenim krivičnim predmetima, te je Vijeću dostavilo rang listu kandidata sa obrazloženim prijedlogom za imenovanje.

Prije razmatranja rang liste kandidata, Vijeće je imalo u vidu da su kandidati na rang listi pod rednim br. 1 i 2 odustali od kandidature za navedenu tužilačku poziciju. Pored navedenog, Vijeće je uzelo u obzir i činjenicu da su po istom konkursu na sjednici održanoj 15. i 16.01.2025. godine, kandidati na rang listi pod rednim br. 7 i 9 imenovani na poziciju sudije Vrhovnog suda Federacije BiH - poseban odjel, da su kandidati na rang listi pod rednim br. 3, 5, 6, 12, 13 i 17 imenovani na poziciju tužioca Federalnog tužilaštva Federacije BiH, dok je kandidat na rang listi pod rednim br. 14 imenovan na poziciju posebnog zamjenika glavnog federalnog tužioca Federalnog tužilaštva Federacije BiH.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH sa obrazloženim prijedlogom za imenovanje, Vijeće je odlučilo da za poziciju tužioca Federalnog tužilaštva Federacije BiH imenuje kandidatkinju na rang listi pod rednim brojem 20 Medinu Džerahović, iz reda bošnjačkog naroda, koja od 01.12.2017. godine obavlja dužnost tužioca u Kantonalnom tužilaštvu Kantona Sarajevo, u odjelu za privredni kriminalitet i korupciju.

Prethodno imenovanju na poziciju tužioca Kantonalnog tužilaštva Kantona Sarajevo, imenovana kandidatkinja je u periodu od 2008. g. do 2017. g. obavljala poslove pravnog savjetnika u Sudu Bosne i Hercegovine, a u periodu od 2006. g. do 2008. g. u istom sudu obavila je pripravnički staž.

Vijeće je nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 96 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 18 bodova od mogućih 20 bodova, što ju je u konačnici rangiralo na dvadesetom mjestu rang liste kandidata sa ukupno ostvarenih 114 bodova od mogućih 120 bodova.

Kriteriji stručnosti i sposobnosti pravne analize imenovane kandidatkinje, koja već obavlja dužnost tužioca, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 4,7. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u konkursnoj proceduri od 96 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 18 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka c) i 59b. st. (3) i (4) Poslovnika VSTV-a BiH stekla uslove za predlaganje i imenovanje na poziciju tužioca entitetskog tužilaštva, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom tužilaštvu, u smislu člana 43. stav (2) Zakona o VSTV-u BiH.

Vijeće je prilikom imenovanja navedene kandidatkinje ocijenilo da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Adekvatna nacionalna zastupljenost u konkretnom tužilaštvu utvrđena je na osnovu popisa stanovništva iz 1991. godine.

Nacionalna struktura 23 tužioca, prema popisu stanovništva iz 1991. godine, bi trebala biti: Bošnjaci (12,0), Hrvati (5,1), Srbi (4,0), Ostali (1,9). Trenutna nacionalna struktura 20 tužilaca: Bošnjaci (11), Hrvati (3), Srbi (4), Ostali (2).

Prema prethodno navedenoj nacionalnoj strukturi u Federalnom tužilaštvu Federacije BiH nedostaje kandidata iz reda bošnjačkog naroda (- 1,0) i hrvatskog naroda (- 2,1), dok je kandidata iz reda srpskog naroda (0,0) i ostalih (+ 0,1).

Dakle, uzimajući u obzir trenutnu nacionalnu strukturu u navedenom tužilaštvu, Vijeće je za poziciju tužioca imenovalo kandidatkinju sa rang liste pod rednim brojem 20, koja dolazi iz reda bošnjačkog naroda. Obzirom da prema trenutnoj nacionalnoj strukturi pored kandidata iz reda bošnjačkog naroda nedostaje kandidata iz reda hrvatskog naroda, Vijeće je imalo u vidu da se na rang listi kandidata, između kojih se vršio izbor u skladu sa članom 59b. stav (3) Poslovnika VSTV-a BiH, nalaze tri kandidata iz reda hrvatskog naroda (redni br. 7, 9 i 14), koji su po istom konkursu prethodno imenovani na određene pravosudne pozicije.

Imajući u vidu potrebu za popunjavanjem pozicija u zakonom formiranom posebnom odjelu Federalnog tužilaštva Federacije BiH za rad na predmetima organizovanog kriminala i korupcije, koja je utvrđena u skladu sa članom 34. stav (1) tačka h), a u vezi člana 59b. stav (5) tačka e) Poslovnika VSTV-a BiH, Vijeće je prilikom imenovanja vodilo računa i o radnom iskustvu i rezultatima imenovane kandidatkinje na predmetima organizovanog kriminala i korupcije, te složenim krivičnim predmetima.

Radi utvrđivanja navedenih okolnosti, radnog iskustva i rezultata kandidata na predmetima organizovanog kriminala i korupcije, te složenim krivičnim predmetima, za kandidate su pribavljena mišljenja u skladu sa članom 59c. Poslovnika VSTV-a BiH. Navedene okolnosti su dodatno utvrđene na osnovu informacija pribavljenih na razgovoru sa kandidatom, u skladu sa članom 53. stav (11) Poslovnika VSTV-a BiH, te uvidom u službene evidencije Vijeća.

U mišljenju glavne tužiteljice Kantonalnog tužilaštva Kantona Sarajevo navodi se, da je tužiteljica Medina Džerahović nezavisna i stručna, ispoljava želju za proaktivnim istragama, kao i želju za složenim i značajnim predmetima, te posjeduje dovoljno radnog iskustva na Odjelu za privredni kriminalitet i korupciju. Rezultate njenog rada najbolje pokazuju podaci o predmetima u kojima je donosila tužilačke odluke i na koncu koji su do sada rezultirali osuđujućim presudama. Radi se o iskusnoj tužiteljici koja je sposobna efikasno i kvalitetno provoditi istragu u složenim predmetima i njena saradnja sa agencijama za sprovođenje zakona je na zavidnom nivou.

Glavni tužilac Federalnog tužilaštva Federacije BiH je nakon pribavljenog stava kolegija tog tužilaštva u svom mišljenju, između ostalog naveo, da je tužiteljica Medina Džerahović u svom referatu imala značajan broj kompleksnih predmeta iz oblasti privrednog kriminala i korupcije koji bi, po sadašnjem zakonskom rješenju, potpadali pod stvarnu nadležnost Posebnog odjela Federalnog tužilaštva FBiH za suzbijanje korupcije i organiziranog kriminala. Imala je u radu visokopozicionirane djelatnike koji su bili medijski eksponirane službene osobe. U odnosu na podignute i pregledane optužnice prilikom kontrole nisu uočeni suštinski nedostaci koji bi se odnosili na pravilnost činjeničnih opisa u odnosu na datu pravnu kvalifikaciju. Na osnovu pregledanih predmeta, mišljenje je da tužiteljica posjeduje značajna praktična iskustva, rezultate i stručnost u složenim predmetima iz oblasti korupcije i privrednog kriminala na kojima je radila samostalno ili kao članica tužiteljskog tima.

Na osnovu navedenih mišljenja, informacija pribavljenih na razgovoru, te uvidom u službene evidencije Vijeća, zaključuje se da imenovana kandidatkinja ima potrebna stručna znanja, iskustvo i rezultate na predmetima organizovanog kriminala i korupcije, te složenim krivičnim predmetima.

Shodno odredbama člana 62. stav (2) Poslovnika VSTV-a BiH, Vijeće je u odnosu na kandidate sa rang liste pod rednim br. 4, 8, 10, 11, 15, 16, 18 i 19 dalo prednost kandidatkinji na rang listi pod rednim brojem 20 Medini Džerahović iz slijedećih razloga:

Vijeće je prije svega cijenilo da su kandidati sa rang liste pod rednim br. 4, 8, 10, 11, 15, 16, 18 i 19, kao i imenovana kandidatkinja u toku konkursne procedure po kriterijumima koji se primjenjuju prilikom ocjene uspjeha postignutog u konkursnoj proceduri, kako u pogledu kriterijuma koji se ocjenjuju na osnovu ocjene rada kandidata u prethodnom relevantnom periodu ili na osnovu kvalifikacionog i pismenog testiranja, tako i u pogledu kriterijuma koji se ocjenjuju na razgovoru sa kandidatima, ostvarili potreban uspjeh za imenovanje na poziciju tužioca entitetskog tužilaštva. Dakle, svi navedeni kandidati su u skladu sa odredbama člana 59a. stav (1) tačka c) i člana 59b. stav (3) i (4) Poslovnika VSTV-a BiH, a u vezi sa članom 61. istog poslovnika stekli uslove za predlaganje i imenovanje na poziciju tužioca Federalnog tužilaštva Federacije BiH.

Prilikom ocjene uspjeha kandidata sa rang liste pod rednim br. 4, 8, 10, 11, 15, 16, 18, 19 i 20, postignutog u konkursnoj proceduri, primjenjeni su kriterijumi iz člana 43. stav (1) Zakona o VSTV-u BiH, uključujući 1) stručnost kandidata, 2) sposobnost pravne analize, 3) komunikativnost i sposobnosti prezentacije, 4) sposobnost kandidata da odgovorno, nezavisno i nepristrasno obavljaju funkciju tužioca, uzimajući u obzir, između ostalog, 5) dosadašnje radno iskustvo kandidata 6) profesionalnu nepristrasnost i ugled, 7) ponašanje van posla, 8) edukacija i usavršavanje, 9) objavljivanje stručnih i naučnih radova, te druge aktivnosti u struci, koji su na osnovu strukturiranog i objektivnog postupka ocjenjivanja, jasno izraženi kroz ocjene.

Polazeći od činjenice da je imenovana kandidatkinja ostvarila manji broj bodova od kandidata na rang listi pod rednim br. 4, 8, 10, 11 i 18, Vijeće je ocijenilo da je takav položaj kandidata na rang listi posljedica male razlike u ukupno ostvarenim bodovima, koja u konkretnom slučaju ne ukazuje na stvarnu razliku u kvaliteti u korist kandidata pod rednim br. 4, 8, 10, 11 i 18 sa rang liste.

Obzirom da Vijeće u skladu sa članom 43. stav (2) Zakona o VSTV-u BiH, prilikom predlaganja i imenovanja kandidata vodi računa o nacionalnoj i spolnoj zastupljenosti u pravosudnim institucijama u kojima se vrši imenovanje, te imajući u vidu činjenicu da u ovom momentu u Federalnom tužilaštvu Federacije BiH nedostaje kandidata iz reda bošnjačkog naroda (- 1,0), Vijeće je u odnosu na kandidate sa rang liste pod rednim br. 4, 8, 11 i 18, koji dolaze iz reda srpskog naroda i kandidatkinju na rang listi pod rednim brojem 10, koja dolazi iz reda ostalih, iz navedenih razloga odstupilo od rang liste i opredjelilo se za imenovanu kandidatkinju sa rang liste pod rednim brojem 20 koja dolazi iz reda bošnjačkog naroda.

Dakle, Vijeće je u konkretnom slučaju cijenilo ispunjenost kriterija, u smislu člana 43. stav (1) Zakona o VSTV-u BiH, ali i posebne uslove iz stava (2) koji se odnose na jednaku zastupljenost konstitutivnih naroda, te rodnu ravnopravnost, pa je iz navedenih razloga dalo prednost imenovanoj kandidatkinji.

Kada su u pitanju kandidati sa rang liste pod rednim br. 15 i 19, koji dolaze iz reda bošnjačkog naroda, kao i imenovana kandidatkinja, Vijeće je uzelo u obzir činjenicu da je kandidatkinja na rang listi pod rednim brojem 15 u zadnjih pet godina obavljala dužnost tužiteljice Kantonalnog tužiteljstva Kantona Sarajevo u Odjelu za opšti kriminalitet, te da u tom periodu nije imala predmeta korupcije visokog nivoa niti odluka u tim predmetima. Ima iskustvo rada na predmetima organizovanog kriminala koji su uglavnom bili povezani sa predmetima za organizovane grupe prometa opojnim drogama u kojim predmetima su se provodile posebne istražne radnje i koje su povezane sa nizom radnji dokazivanja kao i sinergijom u postupanju sa policijskim službenicima.

Kandidatkinja na rang listi pod rednim brojem 19 u zadnjih pet godina je obavljala dužnost tužiteljice Kantonalnog tužiteljstva Kantona Sarajevo u Odjelu za opšti kriminalitet i u tom periodu nije imala predmete organizovanog kriminala i korupcije.

Za razliku od kandidatkinja sa rang liste pod rednim br. 15 i 19, Vijeće je ocijenilo da imenovana kandidatkinja posjeduje značajno radno iskustvo i rezultate na predmetima organiziranog kriminala i korupcije, uključujući i predmete visoke korupcije.

U odnosu na kandidatkinju na rang listi pod rednim brojem 16 iz reda bošnjačkog naroda, koja obavlja tužilačke poslove u Odjelu za privredni kriminalitet i korupciju Kantonalnog tužilaštva Kantona Sarajevo, kao i imenovana kandidatkinja sa rang liste pod rednim br. 20, Vijeće je prije svega uzelo u obzir činjenicu da bodovna razlika između navedenih kandidatkinja nije značajna. Dakle, navedeni položaj kandidatkinja na rang listi posljedica je male razlike u ukupno ostvarenim bodovima (1,7), koja u konkretnom slučaju ne ukazuje na stvarnu razliku u kvaliteti u korist kandidatkinje pod rednim br. 16 sa rang liste.

U mišljenju glavnog tužioca Federalnog tužilaštva Federacije BiH, a nakon uvida u predmete u kojima je vršen nadzor od strane Federalnog tužilaštva FBiH, navodi se da je kandidatkinja pod rednim brojem 16 na rang listi, postupala u 3 predmeta koji se po prirodi krivičnog djela, broju osumnjičenih, broju pojedinačnih radnji izvršenja krivičnog djela i broju poduzetih radnji u toku istrage mogu smatrati složenim predmetima korupcije, dok se kod ostalih 11 predmeta radi o predmetima koji su po svojoj težini uobičajeni (redovni) KTK ili KTOV predmeti. U svim pregledanim predmetima u kojima je podignuta optužnica, nije bilo primjedbi u pogledu činjeničnog i pravnog opisa krivičnog djela, niti u pogledu formalnih nedostataka optužnice, te da se iz naprijed navedenog vidi da ista ima radno iskustvo, rezultate i stručnost u radu na predmetima organizovanog kriminala i korupcije, odnosno složenim predmetima. Uvidom u mišljenje glavne tužiteljice Kantonalnog tužilaštva Kantona Sarajevo, utvrđeno je da je navedena kandidatkinja u periodu od posljednjih 5 godina imala ukupno 29 završenih predmeta organizovanog kriminala i korupcije, dok s druge strane nije imala u radu predmeta organizovanog kriminala i korupcije visokog nivoa (KTKV i KTOV predmeta). Postupala je u više predmeta koji se po broju osumnjičenih/okrivljenih/optuženih lica, broju pojedinačnih radnji izvršenja krivičnog djela, broju poduzetih radnji u toku istrage i interesa javnosti mogu smatrati složenim predmetima, od kojih su pojedini okončani osuđujućim presudama. Posjeduje radno iskustvo i rezultate na složenim predmetima. Posebno se iskazala u radu na složenim timskim predmetima gdje je zajedno sa drugim tužiocima u timu provodila istrage i donosila odluke.

Imenovana kandidatkinja je za razliku od kandidatkinje na rang listi pod rednim brojem 16, postupala u predmetima organiziranog kriminala i korupcije visokog nivoa. U posljednjih pet godina zadužena je sa jednim predmetom korupcije visokog nivoa (KTKV) u kojem je podignuta optužnica, dok je ukupno u radu imala još dva predmeta korupcije visokog nivoa (KTKV) iz ranijeg perioda, u kojima su donesene tužilačke odluke. Osim toga, trenutno je angažovana na složenom predmetu istrage organiziranog kriminala visokog nivoa (KTOV) protiv više visokopozicioniranih osumnjičenih lica. U posljednjih 5 godina imala je ukupno 85 završenih predmeta organizovanog kriminala i korupcije. Postupala je u više predmeta koji se po broju osumnjičenih/okrivljenih/optuženih lica, broju pojedinačnih radnji izvršenja

krivičnog djela, broju poduzetih radnji u toku istrage i interesa javnosti mogu smatrati složenim predmetima, od kojih su pojedini okončani osuđujućim presudama. U svom referatu imala je značajan broj kompleksnih predmeta iz oblasti privrednog kriminala i korupcije koji bi, po sadašnjem zakonskom rješenju, potpadali pod stvarnu nadležnost Posebnog odjela Federalnog tužilaštva Federacije BiH za suzbijanje korupcije i organiziranog kriminala. Iz svega navedenog, zaključuje se da imenovana kandidatkinja posjeduje značajna praktična iskustva, rezultate i stručnost u najsloženijim predmetima iz oblasti visoke korupcije, korupcije i privrednog kriminala na kojima je radila samostalno ili kao član tužilačkog tima, a rezultate rada najbolje pokazuju podaci o predmetima u kojima je donosila tužilačke odluke i koji su do sada rezultirali osuđujućim presudama.

Pored navedenog, Vijeće je u odnosu na kandidatkinju na rang listi pod rednim brojem 16, dalo prednost kandidatkinji na rang listi pod rednim brojem 20, uzimajući u obzir činjenicu da je imenovana kandidatkinja na razgovoru sa članovima Komisije, na kojem se razmatralo i vrednovalo sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti, ostavila dojam da se radi o kandidatkinji od koje se, u konkretnom slučaju u većoj mjeri može očekivati da će uspješno, stručno i savjesno obavljati tužilačku dužnost u Federalnom tužilaštvu Federacije BiH.

U prilog ovoj činjenici govori i podatak, da je imenovanoj kandidatkinji u odnosu na kandidatkinju na rang listi pod rednim brojem 16 na razgovoru pred nadležnom komisijom Vijeća dodijeljen veći broj bodova.

Dakle, neposredan kontakt sa imenovanom kandidatkinjom, pred nadležnom komisijom Vijeća za obavljanje razgovora, pokazao je na strani imenovane kandidatkinje prednost u odnosu na kandidatkinju pod rednim brojem 16 sa rang liste. Na razgovoru je pokazala dobar način prosuđivanja i analize svih mogućnosti (brojni predmeti korupcije i privrednog kriminala u kojima je radila). Navela je primjere rada na kompleksnim predmetima, ističući potrebu rada u tajnosti. Ostavila je utisak osobe koja postupa hrabro i iskreno. Pokazala je visok nivo odgovornosti, kao i sposobnost iniciranja mjera za uspješno obavljanje zadataka. Elokventna, staložena, konkretna i sažeta u odgovorima, vrlo komunikativna.

Uzimajući u obzir sve navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i e) i stav (7) Poslovnika VSTV-a BiH, ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju tužioca u Federalno tužilaštvo Federacije BiH.

U pogledu dijela rješenja o stupanju na dužnost imenovane, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1461-1/2025
Datum: 10.04.2025. godine

Predsjednik VSTV-a BiH
MP
Sanin Bogunić